

+ Stiafen Cavegn, Sedrun

14. 5. 76

(Corr.) Il Stiafen Cavegn, remarcablamein han ils vischins adina numnau el cun prenum e schlattetina, ei naschius il 27 da settember 1898 e morts il 8 d'avrel 1976.

Quei dètg liung viadi terrester, da passa 77 onns, ha el percurriu cun bucca rienta. Schegie ch'era el ha sentiu tscheu e leu la naüscha braunca dil destin, resplendeva sia fatscha adina in gentil surrir. El era adina uera, e sia fatscha cumenta acquistava bingleiti la favur dil proxim. Offender zatgi, na, quei saveva e leva el buca. Tener si da frestg, procurar animaziun e legria, quei era siu natural. En sia cumpignia, leu er'e legher ed emperneivel, leu vegnev'eis ris e cantau dil bi e dil bein, magari entochen viaden ella murenta notg. Siu lungatg era il cant, in lungatg che cuschenta il mal, legra il cor ed anfia dapertut ureglia. Siu tenor sco in bronz ha resunau savens, ha embelliu fiastas profanas ed ecclesiasticas, ha giubilau en legria e lamentau en tristezia. Sco bien cantadur ha el fatg part dil chor viril e buca meins che 60 onns dil chorbaselgia. Cun luschezia giustificada purtava el las fiastas sia medaglia dad aur «bene merenti».

Sco secund affon dils consorts Giachen Giusep Cavegn e Maria Castgina, nata Jacomet, ha il Stiafen passentau sia affonza e sia giuventetgna spel plaz-cadruvi a Sedrun. Da ses geniturs ha el empriu d'appreziar e carezar il tschespet. El ei staus in pur fatg si cun pugn, in suveran ch'ha luvara e barhau cun tschaffen e slontsch. «Tgi che vul vegnir giu dil fatg, sto tschappar il di pil tgau», era sia devisa. El era adina gl'emprem: gl'emprem la damau, gl'emprem la primavera, gl'emprem da fenar, gl'emprem da raccoltar, gl'emprem d'urar. E luvar, gliez luvar'el da camifo, e quei d'in'alva entochen l'autra. El saveva s'enschignar e buca per nuot manegiava siu aug Lucas: «Il Stiafen sa perfin sestellegiar da battegiar ses affons la dumengia.» Aschia entardava quei nuot. Perfin sia sepultura ha «el» mess sillla dumengia da palmas!

Malgrad sia furtina veva el denton adina peda da far part da tuttas devoziuns e processiuns. Beincapiu, da lezzas uras eran las funcziuns religiusas lu empau pli numerosas! Apropos devoziuns mereta il Stiafen senz'auter in tschupi d'arbagias. El ha practicau sia religiun exemplaricamein e cun bravura. El ha veramein urau e luvara. Sia secunda casa era segiramein la baselgia, e perquei ha el era aunc fatg in tschuppel onns caluster. Mintgàton emblidav'el da stgalinar, mo persuenter schev'el ils responsoris ton pli ferm.

E pot eis el era aunc staus, e sco tal va el ell'istoria. El ei numnadamein staus il davos postigliun ch'ha carrotschau denter Mustér e Sedrun da 1920—1926. En tuttaura trottava siu cavallut culla posta da lezzas uras, ed il Stiafen scheva ch'el eri segir pli regulars ed exacts che la locomotiva dad oz. Postigliun er'el in da vaglia, allerts per tuttas curiosiads da ses passagiers. Sa cons el ha delectau cun sias canzuns? «Posta buca biara, mo tgeinina», punctuav'el, dend il tgau.

Zacu, carteivel ina migeivla sera da primavera, eis el confruntaus culla Castgina Berther, feglia da president Gion Andriu Berther da Camischo-



las. Gronds e bials sco'l era, fatscha bronzada e cavels cotschens tut en ina niala, eisi beinspert reussiu d'acquistar la simpatia e la carezia da quella dunschala. Vess la mort dalla tatta Tresa buca retardau empauet, füss ei era iu cheu tut alla bahuta. La maridaglia ha lu giu liug ils 28 d'avrel 1928. Jeu erel in dils pli pigns hospes, ed jeu sai da dir ch'ei era veramein in bi perli.

Ei ha gleiti dau figialanza e la famiglia ei s'engrondida sin 9 affons: 6 buobs e 3 mattatschas. Da lur geniturs han quels survegniu la necessaria appretura, aschia ch'igl ei buca stau grev da secumprovar ella veta e far fortuna. — Renconuschius sco el era, han ils vischins era elegiu el el cussegl da scola. Buca meins che 12 onns eis el staus cusseglier. Siu principal rom era il cant, e cantau stuev'eis vegnir. Igl onn 1972 ei il fegl Antieni daventaus l'unfrenda d'ina lavina. Quella frida ha tuccau ferm' ils ses, oravontut il car bab, che haveva ual surdau il puresser, si'ovra dalla veta, gest a quei fegl. Era quella crusch ha il Stiafen purtau en resignaziun cristiana. «Las vias dil Segner ein bunas, era sch'ellas paran nuncapeivlas», ha el suspirau.

Cuort avon Pastgas s'annunzia la fin da siu viadi terrester. S'entelli, il sgurdin dalla liunga veta veva era modellau el. La purtadira veva smaccau el empau a mun, las combas eran pli erias, e las purginas vevan sblihiu sias bialas nialas. Segns dils onns! In per maldispostadads vevan era aunc contribuiu il lur. Vonzei ha'l puspei fatg prescha, ha mess tut il terrester en uorden ed ei serendius nunspitgadamein el spital da s. Clau. El ei returnaus en bara, nies bien Stiafen Cavegn. Pli paupers ei il mund, ei maunca in um honzeli e réconciliant!

La dumengia da palmas, era in di da peda, han biars vischins accumpignau il car defunct al santeri. Igl ei stau impressionont, mo ei muncava ina vusch dominonta: il tenor dil Stiafen Cavegn. — El rauassi en pasch!

V.B.